

di l'oro certe parole di uno di colegio, si seusano di le opere sue, et si portano benissimo. Et per colegio fono laudati, et scritoli optime letere. *Item*, scrissero una altra, di certi avisi di le cosse di Alemagna; le qual el principe mandò tutti fuora, e fè lezerla.

Di domino Marcho Saracho, archiepiscopo di Lepanto, loco tenente et vicario di Brexa, date a Brexa, a di primo. Come sviseratissimo servitor, non si vede stanco operarsi etc.; come fè a Lepanto; e aricorda nel colpho di Lepanto, lontam di Lepanto mia 14 in 16, se ritrova una ixola, nominata Stridonia, possessa olim per lui come archiepiscopo, con la qual potria viver da 3000 persone, sì ela fertile, lontana da tera ferma mezo mio, e ha uno porto teneria 50 galie, e in dromo di dita isola, in terra ferma, è uno castello, situato in monte, con doi alle, che vien zoso fino a la marina, in la sumità dil qual è una fontana, e similiter un'altra fontana a la marina, nominato Cathacusnopoly; el qual castello è circondato de muro, quasi un passo; da terra, tuto il mondo non el toria; da mar, el se potria con pochi danari farlo inexpugnabile, e si potria li far da 550 fuogi; e perhò aricorda si toglij tal impresa, e mandar X in 12 galie, e far alzar ditte mure; e habitar quel castello, e li abitanti potrà viver di le frue di essa isola; et, principiato, immediate tutti li stratioti si di Lepanto come di altri lochi convicini, vegniriano ad habitar li, et ogni zorno coreriano per quelli paesi; e li basteria l'animo, con 1000 ducati far 500 stratioti, homeni da fati; et è certo, tutti quelli di Lepanto, per esser mal tractati da' turchi; e per quel locho si potria trazer tanto formento quanto si voria; e do galie che stesse li non lasseria andar barcha turescha, e seria la disfazion di quelli paesi, e de necessità converia tuor novo partito; e facillime si potria robar Lepanto, aut el turcho el desfaria, perchè non haveria utilità alcuna. Nè li dardanelli de la punta di San Nicolò obsta, perchè i non se balestrà uno a l'altro, et è tre mia; e facil cossa saria a spianarli con 4 galie; et dice questo, come expertissimo; e tuti quelli luogi di quel colpho dariano tributo a ditto castello, per non essser desfati, come al tempo de l'altra guerra con il turcho, davano a Lepanto, et la camera scodeva di questo da ducati 3500 in suso; et li stratioti potranno corer a Larso, a Agnolo Castro, et fino a Salonieh; et sarà posto nel cuor del turcho; et si oferisse poner la propria vita in tutte occurentie etc.

Da Trevi, di sier Daniel da Canal, provedador, di 28. Come per l'altra avisò dil suo zonzer li, molto

onorato; hora scrive la condition dil locho, di bellissimo sito; li homeni civili, scientifici, literati e artifizii, sono da anime 6000 e più; di anni 15 fin 60, homeni da fati, 1200; è loco di passo, circonda mia uno, cento di muro, con 4 porte, uno contestabele per porta, con lire 21, e compagni 3 con lire X per uno; le muraie molto debile, e assa' bon fosso profondo, con li so spalti di fuora; voria esser qualche forteza, come Caravazo; è gran penuria di viver, per il trar di la biava in bergamascha, e non si trovava uno ster di meio per uno ducato; dividedò non si portasse senza soa licentia. *Item*, quelli de li, justa le letere nostre, pagono libentissime sier Michiel Baxadona, stato de li per provedador.

Da poi disnar fo pregadi. Et prima fu posto una expedition di oratori di Zara, notada per mi, ne la qual tuto il colegio introe, *videlicet* scriver a li rectori la expedition predita, *videlicet*, durante bello rimeter il soldo per staro pagavano chi conduceva biava de li. *Item*, darli la trata di stera 2000 formento a Trani, con le contra letere etc. *Item*, scriverli le provision si fa, di mandarli il provedador in Dalmatia, 200 stratioti, 200 provisionati, tra i qual 100 schiopetieri. E noto, ozi expedimo Jacomin di Val Tropia per far li ditti, e dessemo ducati 700; verà fin 15 zorni. *Item*, mandarli ducati 400 per le fabriche di Zara, la cisterna di Lavrana, e dove bisogna. *Item*, le munition e artilarie. *Item*, stara 300 meio, et miera 20 biscoto per Nadino o dove bisogna. *Item*, darli libertà concludino a le guardie con il ban di Jayza, Coxule e madona Dorathea, con ducati 350, come scriveno a l'anno, con questo, dagino avisi a tempo, e veri, et etiam a Udene etc. *Item*, a Lavrana mandino per provedador sier Giacomo Manolesso, el qual da qui in driedo habi, per spexe, neti ducati 15 al mexe; e poi, zonto il castelan, vadi provedador, e sij di stratioti. *Item*, si a l'oro par, debino meter li stratioti a Nadino, per custodia dil conta' etc. Ave tuto il conseio. Etiam dicessimo di mandarli uno inzegner, qual saria Zuan Lodovico da Ymola.

Fu posto per tutti, *ut supra*, confirmar la election, fata a la Zefalonia, di sier Alvixe Salamon, provedador, sier Zuan Venier, castelan, e sier Hironimo Lion, capetanio di l'isola, per il capetanio zeneral in omnibus; e sia suspeso la parte di far il provedador de li. Et ditta parte ave X di no, el resto di sì. Et fo presa.

Fu leto certa scriptura, presentada in colegio per li provedadori sora le cosse di mar, *videlicet* datali per domino Hironimo da Salò, doctor, zerehar armar di la Riviera di Salò etc., 4 in 5 galie, e far li